

UCAPAN PERDANA MENTERI KETIKA MERASMIKAN PEMBUKAAN JAMBATAN SUNGAI MIRI DI LUTONG, SARAWAK PADA 9 SEPTEMBER, 1979.

Y.A.B. Tan Sri Dato Patinggi Haji Abdul Rahman Yaakub, Ketua Menteri Sarawak, Y.A.B. Dato Amar Dunstan Endawie, Timbalan Ketua Menteri merangkap Menteri Kerjaraya Negeri Sarawak, Yang Berusaha, Dato Abang Yusof Puteh Setiausaha Kerajaan Sarawak, Yang Berusaha, Datuk Engku Ibrahim Ngah Setiausaha Persekutuan, Yang Berusaha, Residen Bahagian Keempat, Dif-dif yang terhormat, Tuan-tuan dan Puan-puan sekalian.

Saya bersyukur kehadiran Allah Subhanahu Wataala, kerana dengan limpah rahmatNya, saya berpeluang melawat Miri dan dapat menemui rakyat dan penduduk-penduduk di sini. Saya berasa bangga kerana dapat melawat bandar pentadbiran Bahagian Keempat, dan menyaksikan sendiri kegiatan dan kemajuan pembangunan di kawasan ini. Lawatan ini, memberi peluang kepada saya beramah mesra dengan pemimpin-pemimpin dan rakyat tempatan, untuk mendapatkan pandangan mereka mengenai isu-isu semasa.

Saya mengambil kesempatan ini mengucapkan berbilang terima-kasih serta setinggi-tinggi penghargaan kepada Kerajaan Negeri Sarawak, terutamanya kepada Tan Sri Dato Patinggi Haji Abdul Rahman Yaakub, kerana memberi penghormatan kepada saya merasmikan jambatan baru Sungai Miri. Saya juga mengucapkan setinggi-tinggi penghargaan kepada semua pihak yang telah bekerja kuat untuk menjayakan majlis perasmian pada hari ini khasnya, dan lawatan saya ke Miri dan lain-lain kawasan di Sarawak amnya.

Pembinaan jambatan di Sungai Miri ini, merupakan satu lagi kejayaan Kerajaan Barisan Nasional dalam usaha pembangunannya. Jambatan yang memakan belanja sebanyak \$1.33 juta, memberi kemudahan kepada penduduk-penduduk di kawasan ini, terutama kepada pengendali-pengendali pengangkutan serta pengusaha dan peniaga-peniaga. Sedikit sebanyak, pembinaannya sudah tentu dapat meningkatkan lagi aktiviti ekonomi di Miri, Lutong dan Kuala Baram.

Tuan-tuan dan puan-puan sekalian,

Seperti kita sedia maklum, adalah menjadi azam Kerajaan hendak meningkatkan kemudahan-kemudahan untuk kegunaan rakyat dari

masa ke semasa, melalui projek-projek pembangunan. Sebagai sebuah kerajaan yang mementingkan hasrat dan aspirasi rakyat, kita akan terus berusaha, supaya kemakmuran dapat ditingkatkan dan keamanan dipelihara, bagi membolehkan semua golongan kaum menikmati taraf dan mutu hidup yang lebih tinggi. Cara yang paling berkesan bagi kita menjayakan cita-cita kerajaan ini ialah, dengan mengadakan program-program pembangunan yang berdasarkan kepada manifesto Barisan Nasional bagi Negeri Sarawak. Manifesto ini, disusun setelah dikaji secara mendalam kejayaan yang telah dicapai, serta keperluan-keperluan yang harus diusahakan dan dilaksanakan, bagi meningkatkan lagi kemajuan dan kemakmuran rakyat dan negeri Sarawak ini. Dalam hubungan ini, Barisan Nasional amat berbangga dengan rekod kejayaannya. Selama 16 tahun Negeri Sarawak berada dalam Malaysia, banyak kemajuan dan kejayaan yang telah dicapai. Sungguhpun begitu masih banyak lagi tugas yang belum selesai, dalam usaha kita hendak mewujudkan sebuah negara berbilang kaum yang mengamalkan toleransi, serta berlandaskan kepada perpaduan nasional dan keadilan sosial.

Peranan rakyat adalah penting bagi menjamin kejayaan, hasrat dan cita-cita ini. Mereka mestilah memberikan sokongan dan kepercayaan kepada pimpinan dan pentadbiran Negeri Sarawak yang ada sekarang, bagi membolehkan segala usaha yang telah dilaksanakan itu diteruskan. Kita perlu mempunyai "continuity" dalam pentadbiran, terutama dalam usaha pembangunan. Hanya Barisan Nasional sahaja yang mempunyai tenaga, kebolehan dan pengalaman, untuk membawa kemakmuran dan kebahagiaan kepada rakyat, serta menjamin keamanan dan ketenteraman.

Sepertimana yang kita semua ketahui, Sarawak merupakan salah sebuah negeri yang kaya dengan potensi ekonominya. Banyak lagi sumber-sumber alam semula jadi, seperti haideroletrik dan bahan-bahan galian logam dan bukan logam, yang belum lagi diusahakan. Dalam hal ini, kita akan menjalankan usaha mencarigali arang batu dan bijih besi di Sarawak. Ia dijangka siap dalam jangkamasa pada akhir masa Rancangan Malaysia Ketiga. Kerja-kerja mencarigali dan memajukan kawasan-kawasan minyak dan gas di Sarawak, akan diteruskan. Melalui pembangunan dan pembinaan kemudahan-kemudahan infrastruktur kita akan dapat menjayakan segala potensi ini bagi faedah rakyat.

Tuan-tuan dan puan-puan sekalian,

Saya tidaklah berhajat hendak menghuraikan satu persatu kemudahan-kemudahan asas yang telah disiapkan di Sarawak. Memadailah sekira-

nya saya sentuh pembinaan beberapa kemudahan sebagai gambaran bahawa Kerajaan Barisan Nasional benar-benar berhasrat dan jujur dalam usahanya membangun dan memajukan negeri Sarawak. Kerajaan Persekutuan Barisan Nasional akan memberikan kerjasama sepenuhnya serta memberi bantuan yang diperlukan oleh Kerajaan Negeri Sarawak.

Oleh yang demikian, rakyat hendaklah memastikan supaya semua calon-calon Barisan Nasional yang bertanding dalam Pilihanraya Negeri Sarawak, berjaya memenangi kerusi-kerusi mereka. Sebuah Kerajaan Negeri yang kuat dan teguh, seperti yang ada sekarang ini, adalah perlu bagi menjayakan segala usaha pembangunan.

Tuan-tuan dan puan-puan sekalian,

Dalam tempoh Rancangan Malaysia Ketiga saja, Kerajaan telah berjaya membina 382 batu jalan di Sarawak. Pembinaan jalan yang menghubungkan Sibu dengan Bintulu, sedang diselenggarakan dengan pesatnya. Kerajaan juga sentiasa menjalankan usaha untuk memperbaiki dan meninggikan lagi taraf jalan yang sedia ada. Memandangkan pentingnya Sarawak mempunyai sistem jalanraya yang baik, Kerajaan Persekutuan Barisan Nasional telah menambahkan peruntukan bagi pembangunan jalan di bawah Rancangan Malaysia Ketiga sebanyak \$109.37 juta. Adalah dijangka bahawa menjelang tahun 1983 penduduk-penduduk Miri dapat berkereta terus ke Lundu di Bahagian Pertama.

Dalam bidang penerbangan awam pula, kerajaan akan terus memperbaiki dan menambah kemudahan-kemudahan lapangan terbang serta perkhidmatan udara. Perkhidmatan udara luar bandar di Sarawak akan diperluaskan apabila kapalterbang-kapalterbang yang digunakan sekarang, diganti dengan pesawat-pesawat yang lebih besar lagi. MAS juga merancang hendak membeli kapalterbang-kapalterbang jet yang sesuai, bagi perkhidmatannya di sektor-sektor yang mempunyai ramai penumpang, seperti di Sibu, Miri, Sandakan dan Tawau. Di Kuching pula, kita telah siap membesarkan lapanganterbangnya, serta mengukuhkan landasan untuk membolehkan kapalterbang-kapalterbang jenis Boeing 707 mendarat, sebuah Kompleks Terminal baru, termasuk kemudahan untuk penumpang, sekarang ini sedang dibina. Seluruh projek ini memakan belanja \$60 juta, dan dijangka siap pada tahun 1981.

Kerajaan sentiasa mengambil berat dalam segala rancangan dan program pembangunan di Sarawak. Pembangunan memerlukan masa yang panjang, kerana ia merupakan proses yang rumit dan kompleks. Bagi menjaminkan usaha pembangunan berjalan dengan licin dan lancar, kita

memerlukan sebuah kerajaan yang mempunyai pengalaman yang terbukti, serta kestabilan politik. Dengan jalan ini, maka segala tenaga dapat ditumpukan kepada tugas berat di hadapan kita.

Saya penuh yakin usaha kerajaan yang berdasarkan ikrar dalam manifesto Barisan Nasional itu, sudah tentu dapat memperbaiki kedudukan Negeri Sarawak yang selama ini dianggap sebagai sebuah negeri yang kurang maju. Oleh yang demikian, saya harap rakyat Sarawak akan memikirkan dengan serius dan bersungguh-sungguh akan soal corak pemerintahan yang mereka mahu. Kerajaan Persekutuan Barisan Nasional perlukan supaya Kerajaan Negeri yang ada sekarang dapat meneruskan tugas dan usahanya.

Tuan-tuan dan puan-puan sekalian,

Berbalik kepada majlis perasmian jambatan ini, saya sukalah merakamkan penghargaan Kerajaan Malaysia kepada Kerajaan Australia yang telah bermurah hati dengan memberi sumbangan sebanyak S730 ribu di bawah bantuan Rancangan Colombo, bagi menjayakan pembinaan jambatan baru ini. Begitulah juga dengan pembinaan lain-lain jambatan di Sarawak, yang telah banyak mendapat sumbangan dari Australia dalam masa 15 tahun yang lepas.

Akhirnya, saya sekali lagi mengucapkan terimakasih serta setinggi-tinggi penghargaan, kepada semua pihak yang telah berusaha menjayakan lawatan saya ke Miri ini. Saya berdoa supaya Allah Subhanahu Wataala memberi petunjuk kepada rakyat negeri Sarawak kepada jalan yang benar.

Tuan-tuan dan puan-puan sekalian,

Dengan ini, saya dengan amat sukacitanya, mengisytiharkan Jambatan Baru Sungai Miri dibuka dengan rasminya.

Terimakasih.